

BH. INFO

Završen je osmi međunarodni speleološki kamp *Vjetrenica - Popovo polje*. "U četiri dana izmjerena je Doljašnica, najveći aktivni ponor Popova polja, obavljen je njen biološki pregled i uzeti su uzorci za laboratorijsko istraživanje specifičnog kalcitnog sedimenta", saopštavaju iz Speleološke udruge *Vjetrenica-Popovo polje*.

Sarajevska umjetnica **Šejla Kamerić** promovisala je monografiju *Two Words/Deux mots*. Organizator promocije bila je Švicarska ambasada u BiH. Šejla Kamerić predstavila je radove nastale u periodu 1999. - 2009., "u kojima se isprepliću rečenice, pjesme i eseji različitih autora koji raspravljaju o njenom opusu".

U srijedu, 26. augusta, u *Umjetničkoj galeriji BiH* u Sarajevu izloženo je najznačajnije djelo našeg velikog slikara **Gabrijele Jurkića** - *Visoravan u cvatu*. U okviru projekta: *Pogledaj me: Izbori*, koji je počeo 7. augusta, posjetioci web stranice UG BiH mogli su, između deset slikara i njihovih djela, izabrati jedno koje će biti izloženo.

Jedan od najzanimljivijih talijanskih bendova, tako kažu, **Jacinto Canek** nastupa u mostarskom *Abraševiću* u petak, 28. augusta u 21 sat. U Mostar dolaze iz Dubrovnika, a 29. augusta sviraju u *Underground Clubu* u Tuzli. Prošlog ljeta **Jacinto Canek** je bio predgrupa *Kultur Shocku Srđana Jevđevića*.

U Mostaru će od 30. augusta do 4. septembra biti održan *Festival autorske poetike*. "U programu, između ostalog, imamo Gradsko kazalište iz Siska sa predstavom *Jonah i Otto* sa **Zijahom Sokolovićem**, zatim Narodno pozorište RS-a, a i Mostarski teatar mladih će odigrati dvije predstave", najavljuje **Sead Đulić**, direktor MTM-a.

Predselekciona komisija Međunarodnog festivala animiranog filma *Banjaluka 2009* izabrala je 38 filmova koji će se takmičiti za nagrade u takmičarskom dijelu programa. Na konkurs ovog festivala pristiglo je ukupno 136 filmova, iz dvadeset i dvije države. *Festival* se održava od 22. do 27. oktobra ove godine.

DAMIR IMAMOVIĆ, muzičar

Damir, Bojan, Eric i Bachar



■ Na festivalu *Umbria Jazz Balkanic Windows* u Beogradu i u Novom Sadu, 28. i 29. augusta, nastupate u kvartetu koji je svoj prvi koncert održao u aprilu ove godine, u okviru programa *Xenophonije* u Sarajevu.

Da, a to je kvartet u kojem sviraju i holandski trubač **Eric Vloeimans**, pijanista **Bojan Zulfikarpašić**, te libanški perkusionista **Bachar Khalife**. Razmijenili smo nešto ranije neke tradicionalne i autorske kompozicije, pa smo u Sarajevu sve to brzo uvježbali. Na tom našem prvom koncertu bilo je super, a bile su pozitivne reakcije i te, da tako kažem, stručne javnosti, ali i publike.

■ Članovi grupe žive u četiri države. Gdje održavate probe prije nastupa u Srbiji?

Postavili smo kvalitetne temelje kada smo prvi put nastupali. Znamo repertoar, tako da ćemo se dan ranije naći u Beogradu i održati probu, kao i na dan tog prvog koncerta, 28. augusta.

JADRANKA MILIČEVIĆ I TAIDA HOROZOVIĆ, suosnivačice Fondacije CURE iz Sarajeva



JADRANKA MILIČEVIĆ I TAIDA HOROZOVIĆ

"Festival *PitchWise* je posvećen feminističkom umrežavanju i aktivizmu"